



Nappaatit tunillaassuuttut akiorniarlugit iliuutsit pillugit Inatsisartut peqqussutaata allannguutaa pillugu Inatsisartut inatsisaat

(Peqqissutsimut Naalakkersuisoq)
(Siullermeerneqarnera)

Siunnersuutip uuma ullormik atorunnaarfissaliinermik taaneqartartup 31. december 2021-imiit 1. juli 2022 sivittorneriinnarpaa. Tamanna naleqquppoq, taamaakkaluartorli tamanna iluatsillugu COVID-19-ip akiorniarneranut maannakkut iliuutsinut oqaaseqaateqalaassaanga.

Isumaqarpunga, Naalakkersuisut pisinnaatitaaffeqarnermikkut nalunaarutit aqqutigalugit assigiinngitsunik sumiiffinni ataasiakkaani nalunaarutit aqqutigalugit aaliangiisinnaasuseqartut. Tassani pineqarportaaq nukinnik sumut atuinissamut tulleriissaarineq. Aammalu politikkikkut aaliangiinerit, innuttaasunut inuussutissarsiortunullu siumut ilisimariigassaannik tunniussineq toqqissisimatitsinnaasut.

Tamanna politikkikkut piumassuseqarnermik pigisaqarnissamik piumasaqaatitaqarpoq, maanna isummerfigineqassammat, siunissami Coronap akiorniarneqarnera qanoq isikkoqassanersoq. Nunap immikkoortuini ataasiakkaani nunalu tamakkerlugu malittarisassiortoqartariaqarpoq, tassuunakkullu qulakkeerlugu, siumut suut periuuserineqarniarnersut, aammalu ersarinnerusumik ammaajartuaarnissamut pilersaarusiornikkut. Suliat suliarineqarnerisa ersarinnerusumik pinissaanut tamanna qulakkeerrinnerussaaq, piffinni ataasiakkaani tuniluuttoqartillugu. Aammalu annertuumik pisariaqapog, Naalakkersuisut tamarmiusut, tusagassiuutinut nalunaaruteqarnerit ingerlattarpatigut aammalu innuttaasunut inuussutissarsiortunullu nalunaaruteqartarnerit.

Manna tikillugu nalunaaruteqartarnerit pingaarnertut pisarsimapput Peqqissutsimut Naalakkersuisumit aamma Naalakkersuisut siulittaasuannit. Assersuut, qanoq nalunaaruteqartarnerit annertusineqarsinnaanerannut imatut pisinnaavoq, Ilinniartitaanermut Naalakkersuisoq sassarsimagaluarpat, meerartatta inuusuttortattalu akornanni annertuumik tuniluuttoqarmat, aasaaneranilu atuannigiffeqarnerup kingorna ataatsimooqqilermata. Tamanna ilisimaneqareerlunilu siulittuutigineqarsimavoq.

Kisiannili naak Ilinniartitaanermut Naalakkersuisup pilersaarutaa, tuniluuttoqarneratigut kiap sunalu suliarissagai?

Inuussutissarsiornermut Niuernermullu Naalakkersuisoq sumiippa, inuussutissarsiortunit ikiorsiissutit apeqqutigineqarmata?

Tassamiuna Naalakkersuisut tamarmiusut Inatsisartunit pisinnaatinneqarsimasut nalunaarutit aqqutigalugit innuttaasut inuussutissarsiortullu peqqinnissaat ingerlalluarnissaallu qulakkeerneqarnissaat, nunarsuarmi tuniluuttoqarneranik pakkersimaarinnissaq siunertaraluguttaaq. Uani Naalakkersuisut ataatsimoortut



maqaasivakka, aammalu maqaasivara, Naalakkersuisunut ilaasortat ataasiakkaat annerusumik akisussaaffimmik tigusinissaat, akisussaaffimmik tunniunneqarsimasunik timitaliinissaannut.

Ersarippoq, Peqqissutsimut Naalakkersuisoq innuttaasut peqqinnissaannut ajornartoortitsinerujussuaq kisimiilluni suliarisinnaanngikkaa. Paasilluarsinnaavara, Peqqissutsimut Pisortaqaarfimmi sulisut pitsaanerpaamik suliniarsimanerat. Isornartorsiugarali unaavoq, politikikkut akisussaaffimmik annerusumik tiguisoqarsimannginnera. Tamanna pingaartumik piffissami kingullermi nalaassimavarput, paasissutissat kukkusut ersarinngitsunillu nalunaaruteqartarnerit innuttaasunik malunnartumik pakatsissutaasarsimmata.

Naalakkersuisut oqariutuuteqarnerminni ammasuusariaqarput unneqqarillutillu, inuit tamarmik ilisimaniassammassuk, susoqarnersoq aammalu susoqassanersoq.

Tamakku ilaatigut qulakkeerniarlugu, suliamik sulisussat inuit sulisinnaasut killeqarnerat oqaatigisinnaasariaqarpoq. Ilumoorsinnaanngilaq, Naalakkersuisutut atorfilittat aqqani toqqorterniarsarineq naatsorsuutigalugulu aaliangernerit atorfilittaniit pissasut. Tamat oqartussaaqataanerat taamatut ingerlanneqartanngilaq. Pinngitsoorani uagut politikkerit, aaliangiisussaavugut. Uani isumaqarpunga, annertuumik maanna misilittagarineqalersimasut atorluarnerusariaqartut.

Partiit siulittaasui nalunaarutininik nutaanik suliaqarnermi tamarmik peqataasarnerat ilisimatinneqartarpugut. Tamatigulli taamaattoqartanngilaq. Aammalu tamatigut isumaqatigiittuunngillat. Peqqinnartutut isigineqarsinnaanngilaq suliap ingerlanneqarneranut tamallu oqartussaaqataanerannut nipangersitsisarneq, nalunaarutissat ilusaannut isumaqataasimanngikkaani aammalu tusagassiutitut nalunaaruteqartarnerit qanoq ingerlanneqartarnerannik isornartorsiuisoqartillugu.

Ilaqutariinnermut- aamma Peqqissutsimut ataatsimiititaliap maqaasivaa, Peqqissutsimut Naalakkersuisup suliaminik akuutissagaatigut. Qaaqqsissut neriorsuutaasimasoq suli utaqqivarput, qaammatit arlallit matuma siorna ataatsimiititaliamut nassiunneqarsimasoq. Taamaattumiuna pissusissamisoortoq pineqartumi politikikkut akisussaaffeqannginneq oqaasinngortinneqartoq.

Taamatut oqaaseqarlunga siunnersuutip Ilaqutariinnermut- aamma Peqqissutsimut ataatsimiititaliamut suliarisassanngorlugu ingerlateqqinneqarnissaa innersuuppara.